

溧陽總管水鏡元公詩集序



李廷選書

聲詩之作其來尚矣蓋肇自虞夏之詠歌殷周之風雅及其後也增而為五言六言七言又變而為詞賦歌引從古于今詩之鳴世者不下百千家然求其辭之工聲之妙多出於草莽羈旅至若王公貴人志得氣滿非性能而嗜之篤者則不暇及茲卓職教邵庠嘗聞前水鏡元公當宋季元初以武功定寇亂以聲詩鳴治平而久不克見今年秋八月公六世孫道泰乃奉遺文一編貺予再拜請言以弁其端謂將重壽諸梓用廣前人志因得徧觀


焉玩夫立春人日之句而公燮調氣象寓焉味夫
昭君楊妃出塞入蜀之什而公感奮情思發焉至
於問歸行李輕如羽沿路吟詩有一船則識公之
廉介渭川湘水多烟雨我欲垂鈎過此生又知公
功成身退之吉其他大章短篇悉皆清新俊逸春
容閑雅熟復之若膾炙在口宮商盈耳誠足以起
人之敬慕惜夫首末脫略未具泰復曰先公存時
是詩已刊行矣中罹灰燼板毀書遺迄今百有年
餘泰非角時知有是詩嘗求弗得近因郡城西塔
浮屠師永寧訪得之他姓余聞而驚歎曰物之晦

明有時譬諸日月昏蝕終必復舊水鏡渾賢久亦
清明龍泉大阿豈終汨沒而不遇張華出耶用是
益知公之文顯而晦晦而復顯盖有所俟也韓子
云莫為於前雖美弗彰莫為於後雖盛弗傳如元
氏述作前後皆有其人豈有美之盛而弗彰弗傳
耶且凡聞善不慕與聒聒同見善不敬與昏瞽同
知善不言與噤瘖同則聞之先達久矣矧公有濟
世之大略安民之偉績敢不敬乎有邁古之雄風
傳世之美玉敢無慕乎仰前修而莊誦徽音敢無
言乎言不稱文辭不彰德適為累而已矣於是述

夫聲詩之由纂夫公詩之要以貽公之後用傳於
不朽不愈於默乎時大明正統九年甲子歲秋九
月吉鄉進士邵武縣儒學教諭吉水謝卓序


[Faint bleed-through text from the reverse side of the page]

溧陽路總管水鏡元公詩集



立春盛雪戲作

丁亥臘月廿五日



玉漏城頭報打春連宵積雪蔽園林
頌春亭畔千夫掃鼓角樓前五尺深
老守拈香幾墜笏營軍攘土勝爭金
擊鞭不見牛蹤跡旋叱衙兵撥雪尋

又和名

零亂長空布粉霰低窠一息盡填平
幾多樵叟難尋路觸處梅花不記名
壓折琅玕如許重飛來簾幙又還輕
東村南畝農夫喜雪霽春風二麥榮
青川水上江東道憲使疎齋盧副使

清如水玉重如山問俗觀風化梗頑貪吏聞風應
喪膽書生見日盡開顏吟來薊北文章貴治得江
東訟謀閑若福蒼生布霖雨他年休道不相關

歷涉并引

予乙亥春收建邑里源草寇謝黃五秋勦黃
龍洞丁伯榮丁丑春會盱城之師破汀寇陸
監阜及擣鼠寇高從周石網峒繼後擒賊首
丁先潘才辛巳圍困鍾石砦招收高日新甲
申冬收勦政和黃華復訖建陽縣十載之間
歷百餘戰俘功奏捷斬賊萬計此書生用武

安民分內事也此來守官溧陽暇日因筆書
於趙信國南圃晚香堂云

復了東陽斬逆黃閩中水鏡姓名香手持國憲安
良善口喻兵機勦叛亡截髮搓繩聯斷鎧捲旗作
帶繫金創音瘡卧薪嘗膽經營了更理毛錐治溧陽

榆窠詞

金陵即事

天連衰草接殘陽猶有金陵郡望香點檢六朝遺
跡處斷碑仍舊管興亡

石硯行

漂陽渺、紅塵杳、訟謀簿書何日了、日斜猶自未
休衙、欲寢樓頭已催曉、政出多門空擾、休誇金
印大如斗、君不見古人惜硯如惜珪、端溪妍醜紛
不齊、此來囊中無一錐、但携石硯作親隨、官罷奚
奴背歸去、濃磨香墨賦樵溪

投金瀨貞女墓

古柏荒煙土一坵、當年甘作楚江囚、野棠滿徑開
無主、金瀨依然水自流

廢祠金陵道中

繞殿煙蘿歷幾春、依稀似漢類亡秦、斷碑埋沒蒼

苔裏、年代淒涼不可詢

小窓新竹

戢、龍孫脫箨新、此君直節聳蒼璘、閑窓戲作文
同體紙上蕭、為寫真

小滿

子規聲裏雨如煙、潤逼紅綃透客氈、映水黃梅多
半老、隣家蠶熟麥秋天

訪屏風山

獨出南關訪翠微、鐘樓佛閣靄霏霏、草根縛筆題
墻了、更與山僧伴話歸

四月八日 戊子

天氣輕煙細雨中江闌節序頗相同去年此日延
平過滿路薔薇襯落紅

南郊訊步

竹鎖橋邊市青帘賣酒家幾多臨路柳無限出墻
花遊女尋芳草田翁種土瓜吟鞭遙指處煙雨暗
桑麻

弔昭君

馬智遠詞

昔年上馬衣貂裘不慣胡沙萬里愁閣淚無言窺
漢將偷生陪笑和箜篌環珮影搖青塚月琵琶聲

斷黑河秋當時若賂毛延壽安得高名滿薊幽

除夜吟并引

予丙戌歲除寓三山督造南臺浮橋丁亥除
夜仍客漂陽嘆故園樵嵐之九曲傷人生如
此之漂零懷古感時因有是作

去年臘月客三山今歲江東尚未還浪萍蹤梗傷
漂泊經歲天涯未得閑、來點檢人間事秋月春
花知幾度浮生端的為誰忙茫、踏遍紅塵路樵
溪九曲歲將暮沙堤橋畔春如許臘殘春近憶家
山樵嵐笋蕨還知否朝中宰相五更寒鐵甲將軍

夜度關豈問嚴寒并盛暑何嘗半霎得安閑官途
自古同逆旅駟馬黃金等塵土小園昨夜梅花香
獨坐書窓對溧陽自嘆孤踪何所似年々此際費
平章丙戌除夜寄海鄉南臺舟楫為施張成此興
梁不三月橋高激浪如飛雪萬邦車馬登此橋丁
亥除夜客吳頭吳頭楚尾佳麗地淮水淮山依舊
翠淮民近日訪老夫問我姓名驚且畏國泉水鏡
即元淮淮上英雄安在哉唯有鳳凰臺下水夜深
隨月過長淮月來水去空相向淮北淮南謾惆悵
世異時移自古然只有江山似無恙朱雀橋邊柳

色新烏衣巷裏盡埃塵功臣將相今何處滿目荒
烟野草青君不見六朝遺跡賞心亭清涼寺畔石
頭城晉代風流隨水去墨客騷人枉費吟又不見
今人視昔摠傷神後人猶能來視今隔江猶唱當
時曲半是秦淮新附人光陰轉轂不曾停天涯桃
李又還新添感慨歎飄零兩朝水鏡作微臣吟遍
秦城及漢陵眼前有景說不盡寓意兼吟除夜吟
除夜吟復吟屠蘇爆竹鬧階庭太平簫鼓鬧歌
聲今年除夜多生意臘月廿五已交春

戊子元旦試筆

金西
向曉排門賀起居歡聲鼎沸動閭閻春冰破玉游
魚戲臘雪溶酥細柳舒物象山川添秀麗風流水
鏡試圖書臘前三見田中白破塊催耕已下鋤

人日書懷

麗日池塘凍水銷嫩紅嬌白見芳苗郊原雪霽東
風軟籬落梅殘碧玉凋便好踏青穿細草不妨攜
酒驟鳴鑣遙憐九曲沙堤畔多少鵝黃上柳條

南園繁梅

每見梅花輒舉觴月香水影共商量南園一樹春
風裏費盡留雲借月章

元宵盛雪戲作

戊子

一夜東風惡春冰散作花柳條金綴玉紅杏粉籠
霞頃刻鼇山白縱橫雪片斜遊人都買炭燈火兩
三家

初春二首

春入枝條柳眼底草根纔見雪消時梅花片、飄
香玉多半隨風落小池

又

春淺芳苗冷未禁輕紅嬌白露芳心陌頭楊柳黃
金嫩一夜春風一夜深

予暇日喜觀書畫客有示以二圖乃昭君出塞楊妃入蜀悉是宣和名筆客以詩請就書

卷尾 中州詞

昭君出塞

西風吹散舊時香
收起宮裝換北裝
猓帽貂裘同錦綺
翠眉蟬鬢怯風霜
草白雲黃金勒短
舊愁新恨玉鞭長
一天怨在琵琶上
試倩征鴻問漢皇

楊妃入蜀

楊妃亡國禍根芽
剛道宮中解語花
慣得祿山謀不軌
釀成中國亂如麻
馬嵬坡下東風惡
龍鳳旂

前戰士譁吹落海棠紅
滿地至今猶作畫圖誇

春詞

繡被春寒掩翠屏
家常只繫石榴裙
鮫綃誤落花磚上
旋向沉香火上薰

早春即事

柳線初黃眉碧天
綠窻金獸裊輕煙
年春事關心事斜
劈鸞牋賦此篇

午寢

鶯來踏碎亂紅翻
盡日簾垂晝永閑
午睡覺來香味遠
金猊猶有鷓鴣斑

鳳凰臺

此地可消憂
長江不斷流
橋邊朱雀市
城外白鷗洲
鳳去名猶在
潮回浪倒收
六朝春夢散
遺跡在荒丘

春丁宿齋值雪李平山出示賦雪長句燈
前就書一絕以還

春丁夜半雪翩
壇杏宮槐勝玉鐫
不是趨陪行
俎豆便當借筆繼長篇

南園新柳

萬縷依帶嫩
黃斜穿紅杏弄
踈狂晝長舞
得東

風困半倚鞦韆半拂墻

春遊憶武陽

繞郭煙嵐溪上來
千峯碧玉一環開
紅雲島上熙
春路簾幕重闕楚臺

寄賴樵山

戊子

去歲客三山
今春寓溧陽
簿書叢裏過
笋蕨夢中香
官冷無餘俸
吟豪富錦囊
樵山能念舊
郵傳不相忘

春遊

子京詞
出入體

盈頭花壓帽
簷低泥污春衫
任醉歸紅杏枝頭春

意開綠楊影裏曉鶯啼歡聲笑語簾櫳外小蒼花
藤錦繡圍日暮都門猶未掩管絃兩、過城西

花朝勸農

守令郊行致太平田夫有話不能聲勸農勸得民
無擾試問如今有幾人

逸興

公餘試筆畫梅梢茶罷焚香擲卦爻十冊古書都
讀遍閑看燕子壘新巢

春閨

杏花零落燕泥香閑立東風看夕陽倒把鳳翹搔

髮影一雙胡蝶過牆東

春風曲

佳人對鏡着衣裳鶯轉新聲入洞房鬪草可憐春
夢惡今朝輸却縷金囊

賞春樓書懷

醉盡春風興未闌飲豪惟恐玉杯乾狂風橫雨春
能幾卧酒吞花意自寬役、奔名腰似沈區、競
利鬢如潘人生最貴閑為貴不待三年即掛冠

郊行

城東一簇野人家門枕清流淺帶沙籬角欲晴喧

燕雀門前過雨濕桑麻橋因春水三番斷柳礙東
風一向斜景物似知寒食近村：開遍野棠花

寒食 戊子

花尖遠：見鞦韆又值清明錫杏天去歲斬新鑽
燧火今年依舊起厨煙萬井罇罌人祭鬼九原松
柏紙飛錢客中對此吟魂斷處：山頭有杜鵑

再賦絕句

城西爛熳折桐花珠翠郊原散綺霞試問漂陽新
燕子今年寒食又無家

趙信國南園

海棠深院雨餘天紫燕雙飛整復翩夾岸緗桃紅
似火滿街楊柳綠如煙夜遊就月燒紅燭午興持
竿上釣船水鏡此情天付與箇中彷彿在樵川

春閨

滿院楊花不捲簾落紅滿地草芊芊：夜來妾夢頻
驚覺元是窓前有杜鵑

讀李易安文

綠肥紅瘦有新詞畫扇文窓遣興時象管鼠鬚書
草帖就中幾字勝羲之

松檝并引

寒光亭居溧陽三塔院後余奉檄廣德建平
體訪民田水灾舟行過此漫書一律以紀歲
時戊子三月一日

東風吹柳拂輕煙畫舸西流訪水田萬頃寒生波
底月一湖印出鏡中天舟移曲岸看新燕手拂殘
碑歎昔年惆悵于湖生感慨寒光亭下草芊芊

湖有問訊湖
邊春色詞

上巳日戊子并引

丁亥歲脩禊日子客福唐得助樓詩人李北
山約與危西麓湯中山鄭梅心諸公東禪曲

水之遊予以冗奪不及歲月流轉今日捧檄
于廣德建平持觴之餘就書一絕

去年上巳客三山詩友追遊不及攀今日建平南
陌上停驂把酒望闔關

建平道中

穀雨閣江天前村漲綠濺馬嘶橋外柳人喚渡頭
船紅杏飄零玉淒風透薄綿欲沽村酒啜林外有
炊煙

書建平縣驛并引

廣德路建平縣臨湖西北之田與蘇湖常秀

漂陽河道相隣丁亥秋夏之間霖潦不止禾
苗悉為水毀農家非惟失望而官租亦不能
免茲蒙上司委予親行體訪已得其實力為
保申少解倒懸此去不特蠲租其賑恤之惠
兼行矣就書五十六字寄邑之驛舍以為民
田水滂之證印也戊子春仲

秋夏霖、浪拍堤田疇水與樹腰齊一年歲計成
潢潦萬頃洪波入稻畦戶、午炊蒸木葉家、晚
飯煮黃蘗老夫奉檄蘇民力且免田夫日夜啼

春分日雪

怪得春陰透骨寒東風吹雪壓欄杆漫天柳絮迷
鴛瓦捲地鵝毛礙遠山鬪草園林難辨葉鞦韆巷
陌不成歡玄禽海角應知冷捲盡珠簾未見還

南園杏花

燕脂萬點怯輕寒蓓蕾枝頭絳雪乾昨夜南園春
雨過玉人曉起揭簾看

春閨

東風寒似夜來此繡被重溫疊彩霞錦幄紋屏珊
枕冷生愁凍損海棠花

次趙信國韻

物換星移又幾年兩淮依舊水參天當時舟楫成
何濟祖述中流謾擊鞭

東坡集信國南園

南園天然處玻璃一鏡池水壺天上下雲錦樹高

低御筆揮亭扁

理宗書
晚香堂

江山助賦詩吟餘刪古史

此意有誰知

文婦詞

掠起雲鬟賦小詩文窓晝永笋初肥木香架畔薔
薇落簾幕無風燕子飛

蘇東坡郊行

詩句多於馬上成推敲未穩與誰評吟安一字迷
歸路誤入杏花村裏行

次盧疎齋贈溧陽道錄徐松隱韻

眠雲隱市廛對月能自樂鍾鼎不關心松風動幽
壑

蘇東坡贈儒術馬菊庄

并引

菊庄馬君驤友乃淮海之奇士也騷人墨客
甚嘉之挾範圍之學流寓金寓一日攜詩過
訪為書一律少見江湖歲寒耳

種菊吟詩道味全四時長是菊花天成名萬古為

詩品立傳于今號菊仙君負長材遊建鄴我羈寸
祿客金淵公田縱得三千頃爭似君平賣卜錢

春感

一樹緗桃不忍看料伊天際獨凭闌欲知無限傷
情處滿紙春心墨未乾

可笑

容齋隨筆續三章議論中間字：香南海一詩多
寓意就中窺竊有餘芳

水灾行

丁亥六月十九日霖潦大作蘇湖常秀與漂

陽圩田禾苗悉為水毀黎民絕食漁舟銜尾
過江乞食於中州因筆賦此

丁亥六月十九日此日立秋：葉碧連宵洵：雨

滂沱萬頃圩田盡作河高田得此禾倍出低田不

能收一粒只今斗米直萬錢縱有金珠無處覓哀

哉田夫遭此荒蘇湖富戶吃糟糠富戶喫糠猶可

為貧民山中掘野藿君不見小舟纍：若魚貫奔

入中原乞飯椀中原有客念爾饑餘舖剝粟悉與

之饑民饑民心勿欺爾今飽後當自思不是中原

多米麥浙西無術療爾饑

試筆

水鏡行軒筆似椽醒揮醉掃得相兼墨汙衫袖飛
鴉黑紙落雲煙發筆鈔縱橫未讓僧懷素放蕩還
同白玉蟾一從夢得純陽墨說與江淹亦自謙

秋至

秋思無消遣從來不下碁汲泉烹建茗對月論唐
詩更羨陶潛醉從教宋玉悲雨中尊菜美此意有
誰知

立秋

戊子七月
初六日

報道南園景物幽樓頭新月掛銀鈎懸聞河漢雙

星會未見梧桐一葉收夢裏不知身是客覺來方

信夜來秋遙憐水鏡清如許門外依然九曲流

九曲
也

水鏡

水鏡秋來後寒光分外明青天磨不盡神筆畫難
成風月吟情足樵嵐歸路平一般閑富貴不肯讓
公卿

姑蘇長老以詩惠茶次韻奉酬

一紙親書到微茫水國賒不題霜後橘先寄雨前
茶石鼎烹新火銀濤輓素車枯腸搜未遍已覺筆

生花
一
江上白鷗居身輕入太虛清標從古瘦非為食無
魚

北望
公餘信步上譙樓雲淡天低萬里秋遙望神州煙
靄裏夕陽紅處是瓜州

賞心亭妓宴

冷落孤煙晚照中凭高撫几暗銷魂休嗟淮水東
頭月且聽飛瓊勸一樽

晚眺

極目高樓四望賒西風颯、動胡笳遙看水遠孤
村處無限殘陽送暮鴉

金山寺

金山突兀到窓軒四面雲濤襯畫船煙水模糊迷
佛國風雲髣髴隔青天鐘聲響處魚龍避泉眼通
時海井穿吟罷倚闌江北望淮頭處、息烽煙

贈溧陽表背梅生

正直端方表御屏羣書萬卷日相親慣裁翰苑宣
麻紙曾綴都堂拜相綾古史幾經標目錄新詩長

為出精神更煩整頓江南畫伴我書窓枕曲肱
五直送廣德路同知蕭友山

漢綬君家得正傳論功久合冠台躔詩留淮海文
章富名重山東道義全好去朝中居鼎鼐暫來江
左治桐川年來廢却雲萍錄他日相逢誦此篇

戒僕

南圃吟詩處鈎簾對遠山野花常自落幽鳥不曾
閑自愧疎迎接何嘗絕往還詩翁任來往門鑰不
須關

初秋

萬里青天一鴈飛黃蘆白葦顫斜暉閩川猶自嫌
秋暑昨夜淮頭換衲衣

南園越女

金杏牆頭竹粉消柳陰：下水平橋鳳簫貼出尖
新字鬢影低垂品六么

秋閨

團扇初隨碧簟收畫簾歸燕尚遲留閑堦弄影穿
明月笑捻流螢說早秋

七夕

雨過涼生枕簟秋玉人乞巧會粧樓未將彩線穿

針孔先隔珠簾望玉鈎

重登鳳皇臺 二首

獨上高臺望帝鄉石麟無語草茫茫
重來只見淮東水盡把閑愁付夕陽

又

龍爭虎戰舊江山潮打空城指顧間
見說麗華沉井處石痕猶帶鷓鴣斑

西風 仁甫詞

西風一夜過長郊吹透孤松野鶴巢
荷減翠時黥雨蓋柳添黃處脫枯梢
不煩紅袖揮紈扇賴有新

詩作故交水鏡池邊秋富貴芙蓉十頃盡開苞

蘇民 并引

予丁亥秋仲溧陽之任蓋金困乃金陵之上
邑也至元丙子歲陞為溧州繼後為溧陽府
又從而陞為溧陽路凡科敷和雇和買却與
饒信建康一體應辦以致民力凋瘵本路府
判吉祐之陳言乞依舊為縣隸建康路管領
似望官民兩便在後展轉行下體覆未蒙定
奪庚寅春予因公到省以常州路宜興縣嘉
興路華亭縣苗石戶計皆浮於溧陽之上亦

止陞為散府呈乞合無將漂陽路改作孤州
少蘇民力已蒙准呈入卷議咨未委從否先
賦此篇以待解職云爾

漂陽風土類淮頭古隸金陵接上游雖陞一路猶
如縣力上三章乞改州不待折腰歸九曲地名便

尋故事賦三休老天若有從人意民瘼民憂得少

瘳

至元二十八年改
作縣仍隸建康

試筆

薄官金困久常同僧道親此來為遠客歸去作閑
人豈羨朱門貴何憂白晝貧吟餘揮草帖水鏡愈

精神

鴈字

一夜西風一夜寒翻鴉亂葉滿長安遙天印出書
空鴈好似張顛字一般

光陰戊子

去年一路稻花開今歲秋成社又來窓外日光飛
野馬竹根水活長蒼苔休誇列鼎鳴鐘貴寧免朝
烏夜兔催轉眼梅花飄漂水樵陽律管又吹灰

觀稼

西成萬寶應秋收一望黃雲作勝遊不特出郊沽

社酒更攜詩友訪清幽

石頭城 二首

石頭據險昔人城
斷壑連山接杳冥
豪傑盡隨流水去
去年江上草青青

又

霸業回頭一笑空
山河千古送英雄
眼前幾許興亡事
盡在秦淮落照中

寒光亭在江東溧陽三塔院
歲月寢久今無之矣
唯存廢墓碑碣草土而已
騷人墨客登覽之餘
可勝感慨即席賦草分韻得

遮字

連天接水送青蛇
怨入王孫似可嗟
薊北茫茫青塚茂
江東冉冉暮雲遮
蔽葺煙帶雨蕪城暗
傍砌侵堦夕照斜
野火可憐燒萬頃
一經春雨又萌芽

暮秋

晚節堂前碧澗通
南園倏忽老西風
經旬不到茅齋去
葉落新添一徑紅

上雪樓程侍御

玉立清臺吐膽肝
高風凜冽襲人寒
裂山摧岳詞臣筆
觸佞除姦獬豸冠
翰苑十年刪野史
雪樓千

古號清官倘憐遠宦飄零客勝獲金爐九轉丹

九月十五日 戊子

獵、西風吹帽斜騎驢閑到野僧家莫言草舍無
紅袖試看籬邊有菊花憶昔道峯書夢記如今江
左聽胡笳吟餘東起如椽筆水鏡歸來學種瓜

水鏡

水鏡澄、浸素秋就中富貴抵封侯晚來天卷紅
霞散萬頃玻璃爛不收

農家

田夫有話向誰言麥飯稀、野菜羹半頃薄田憂

戶後近來賤買與人耕

戊子中秋

丁亥歲此日
問戌溧陽

萬里天衢夜不扃婆娑樹下有蟾靈庾公樓上詩
千首水鏡池邊玉一庭去歲辭家登古道此宵對
月揖金星故園巖桂應無恙見說來秋分外馨

再賦

去年此日離樵川者舊殷勤別馬前躊躇寸步如
千里倏忽中秋又一年筆怒每招奸吏妬句豪常
得野僧編問歸行李輕如羽沿路吟詩有一船

望淮樓

向晚登樓望遠山浮雲密處是長安無詩可說淮
頭事獨倚西風十二闌

附錄并引

洪內相邁字景盧饒州人嘗中詞科入從出
藩在翰苑最久慶元間嘗有表云孤平一介

遭值四朝竊科第於紹興乙丑之春正翹橐
於乾道丁亥之歲建太上議堂之詔啓秀園
嗣國之謨有夷堅志及容齋隨筆續筆至五
筆予總角時嘗閱隨筆內一則吳激小詞云
先公在燕山赴北人張摠侍御家集出侍兒

佐酒中有一人意狀摧抑可憐扣其故乃宣
和殿小宮姬也坐客翰林學士吳激賦長短
句紀之聞者揮淚詞寄人月圓云南朝千古
傷心地還唱後庭花舊時王謝堂前燕子飛
向誰家恍然相遇仙姿勝雪雲鬢堆鴉江州
司馬青衫淚濕同是天涯激字彥高米元章
壻也徽宗朝充翰林院直學士又春從天上
來海角漂零之詞亦彥高所作也其人月圓
一詞除容齋隨筆所載予自總角以來絕未
嘗見人舉似自歸附之後有中州士夫或書

於郵舍之壁或歌於樽俎之間始信隨筆所
言不謬矣其詞中所謂雲鬢堆鴉者自漢唐
及宋中外仕女無問高下皆一體梳宮鬢雲
鬢蟬鬢靖康間徽宗喪國之後中原仕女悲
傲殘金服飾梳粧雲鬢者已無之矣因筆戲
書一絕以紀婦人衣粧之承襲云

越女吳姬不解愁
鬆雲鬢舞梁州
雲鬢例呼蠻體樣
如今都學緊梳頭

天台山

彷彿天台隱石橋
風煙高處豁雙眸
就中有路通車馬
此外無山礙斗牛
萬壑時聞泉韻響
半空常有磬聲幽
老僧說遍天台話
許我來生可剃頭

白露

一夜西風掃敗荷
井梧淅瀝葉辭柯
疎星落處青娥會
梨葉紅時白露多
水鏡三年為楚客
張騫幾度泛天河
田頭父老斲新酒
更說今年好晚禾

中秋席上贈歌妓

東坡詞

珠履金蓮細釵橫
玉鳳皇捲簾邀夜月
開宴出紅粧
玉笋敲檀板
櫻唇破海棠
月斜人欲散
餘韻尚悠揚

悠揚

東坡詞

豪飲

艷質風流設玳筵吟詩賭酒索團奉年來事、多
慵懶只有樽前似少年

太湖

畫圖詩句搃相宜賀老當年作品題好是素秋明
月上鏡中一萬頃玻璃

秋江遠興

移舟買酒近菰蒲北望揚州有若無鴈字欲書興
廢字長天無語接平蕪

寒露

昨夜西風急朝來物象舒正當寒露節偏稱野人
居水鏡清如許賓鴻勢若書黃花紅葉外着我坐
茅廬

淮河

一片黃河畫角秋西風獵、過淮頭當年戰骨消
磨盡只有長江不斷流

次虎丘山劍池韻

蒼、古木擁高樓劍跡砒然石半留試問虎丘山
上月古今幾度照蘇州

小春

橘綠橙黃紅葉多海棠無奈小春何梢尖幾點燕
支闌開到南園第一窠

試墨

岳陽詞

閑來試墨綴篇章得句清新過晚唐竹几暗生龍
尾潤筆鋒微帶麝臍香庭珪膠法燒魚劑巖客煙
煤點漆光水鏡吟毫多得助一齊收拾付詩囊

巖客

洞賓名也

南園訊筆

公餘不看利名書每到南園輒賦詩意外煙霞常
自得胸中水鏡本無私從他愛把銀燒鐵信我能

調藥染鬚七寸筆同三尺劍就中寧有幾人知

己丑春廉五總管李壽卿公出溧陽酒邊

稱頌尚書省椽王直卿父母在堂齊年八

十此乃人之罕有者囑予即席賦詩以詠

其美

見說靈椿聳兩枝直卿宜掛老萊衣一經教子人
間有八十雙親世上稀

遣興

筆法新來分外清呼童洗硯遣餘情好詩每向無
心得戲墨時於信筆成醉裏草書前赤壁燈前細

讀短檠行新蔬早米炊香飯石鼎茶苗細烹

公餘日課

萍根江湖上勞生不整停客塵今古道秋夢短長
亭水鏡清無滓天衢夜不扃如何供日課寫字誦
黃庭

秋興

棲鳳枝頭落葉黃溧陽新鴈已成行南園莫訝無
佳致梨葉紅時秋興長

天水鑑對月

戊子
小春

昨夜新霜釀曉晴晚霞入海耀南閩可憐天際鄉

關月也到金困照旅人

閩中謠

廢却農桑為戰征漁樵無計望昇平近聞閩地科
銀課還有英雄作史評

立春日賞紅梅

己丑

昨夜東風轉斗杓陌頭楊柳雪纔消曉來一樹如
籐杏開向孤村隔小橋應是化工嫌粉瘦故將顏
色助花嬌青枝綠葉何須辨萬卉叢中奪錦標

懷古二首

金陵古號帝王州盡日長江不斷流甲馬如山今

羽化城壕似鐵只空休千年天整猶平地六代宸
宮盡土丘昨夜秦淮新鴈過壯懷客裏始驚秋

又

鳳皇臺上鳳皇遊一水中分白鷺洲古寺曾經天
子幸此詩知是謫仙留晉帖龍蛇猶在紙秦樓珠
翠已無休至元戊子重登覽多少英雄白了頭

評史

從古於今幾建都文英武烈足規模興亡自古皆
天理非是前朝不丈夫

崇玄道院繼在軒韻

占得金鰲山上山就中景物與天寬日高翠麓神
仙過夜半虛簷列宿寒自有佛泉通水鏡熙春山
有大瀉
泉更無邪氣碍靈壇老夫移此山中檄要使龍蛇
總獲安

再賦灣字韻

樵江獨秀號春山新建琳宮鎮碧環掛眼煙霞圖
畫裏闌溪樓閣紫雲間玄猿戲掬清泉飲隱士常
同白鹿閑水鏡願為林下客憑君添我釣松音
嵩灣

金山寺

重到就書千佛閣三
大字送惟揚信老

江濤滾滾護袈裟攤出金山一迳斜門前古木碍

新月塔尾風幡卷暮霞水鏡揮成千佛閣曉鐘催
起萬林鴉望中霽色微分處隱：揚州十萬家

筆硯

常將筆硯賦吟情吟得南園物：靈掃盡寄來三
百幅何時會寫換鵝經

南樓

向晚西風入翠微樓西一隙透斜暉寒蟬底事聲
淒切催得飛鴉打陣歸

蘓堤秋宴 三首

湖上秋來景物鮮芙蓉綠橘間黃橙一壺水鏡清

無際萬頃秋光靜不轟新鴈數行書草帖畫船相
並共吹笙瓊奴唱得歌喉穩倒插秋蟬勸玉觥

又

南北高峯鑱翠雲山藏樓閣帶煙輕欲凋楊柳猶
貪舞半破芙蓉未老成波底畫橋天上動湖邊珠
翠鏡中行水晶萬頃浮波面照出孤山分外清

又

誰築長堤壯錦城東坡千古得佳名樞霜夾岫同
丹綺水鏡週迴類月明白酒黃柑呼妓唱紅螺紫
蟹就船烹我來祇賦西湖水還有高人鑒此情

閨情

唾尖茸縷濕燕支繡出相思一首詩繡到相思情
極處天涯傅粉可曾知

端陽新月

五月初三後天衢夜不扃遙看一痕月指破楚天
青

樵嵐小景

沙堤九曲接郊原寫字樓臺傍水軒不網池塘魚
極樂捲簾庭院燕知恩道峯一直迎窓戶樵水三
迴透竹園月白風清誰是侶西江水鏡相山元

戊子臘雪 三首

海濶雲濃凍未收滿天和氣到皇州幾多粉蝶空
粘樹一點紅塵不碍眸水鏡窓橫梅印月畫簷瓦
溜玉懸鈎釀成四海豐年兆軍飽民安百不憂字

又

同雲一色覆郊坰零亂長空布粉霙門巷轉頭樓
忽白兒童拍手笑還驚竹林何啻千鈞重池面由
來一羽輕皓鶴中宵迷夜月西湖水鏡不朦清字

又

四野寒雲攪不開六花飄墜舞徘徊一池水鏡無

纖翳萬里紅塵絕點埃柳絮渾疑春思老夜窓驚
訝月華來生涯漸入東風裏一麥如茵處開埃
未一守歲戊子

己丑鞭春

塑出泥牛春信回隨年五彩應時開田頭父老推
犁梃天下公侯候管灰偷寒送暖朱門去搶腳爭
頭白上來水鏡今年多利市春幡雪柳滿樽罍

金困南圃

趙信國花園予
擬揭家居此

信國曾居此掌兵老夫流寓可逃名門闌竹石如
詩淡水鏡池塘類月明就買田園資老小更收村
僕作家丁樵嵐風月終無恙何必區區問戰征

暮春

南圃紅銷綠又肥連宵風雨怯春衣曉來江漲柴
門外夜半山尖杜宇啼麥浪翻細綠柳綿衰
衮鬪高飛客中寫此堪人事盡付家僮帶去歸

己丑清明

自小江湖習簡編墓田壠在臨川十年福建遭
兵火兩度江淮遇禁煙莫訝無家寒食客誠如得

道地行仙杜鵑不必多言語已買江東二頃田

三月三十日賦楊花

顛狂隨蝶飄池館尖巧因風入洞房今日似知春
欲去天涯繚繞餞東皇

自遣

堯夫吟

閑中筆硯養精神水鏡長同天地春休訝未全貧
賤樂也能康濟自家身

新月

遙望城頭玉一彎清光未滿已堪觀不知天上何
年有最憶金閨獨自看水鏡揮毫先賦此庾樓暢
飲未成歡嬋娟三月纔成魄我欲乘風入廣寒

冬至用草堂韻

子年子月子時催得江東春信來重尋彩筆賡
詩句一任香膏地燭灰水鏡潛折千里麥西湖豈
羨萬株梅太平本自無形像祇聽人間勸酒盃

歲子時
冬至

又

瞬息光陰不待催金困又見一陽來繡工刺刺三
迴線古鼎多燒一篆灰天地春回舒化日園林雪
霽見真梅沙堤細柳開青眼萬國迎春薦壽杯

歲

己丑正月二十日雪和黃字韻

紛、糝玉若琳琅萬里江山色異常墜玉梅英飄
膩粉藏金柳眼弄輕黃中宵竹圃琅玕折向曉冰
壺水鏡光遙望太湖三萬頃絕憐一葉小魚航

戊子己丑庚寅元宵下雪戲作

聳翠鰲山接漢霄年、此際六花飄萬家簾幙閑
燈火一色彤雲翳斗杓是處園林粒雪柳金番呀
鼓飲蔥椒星橋火樹瑤花落片、飛來水上消

正月十六日雪霽

庚寅

萬里穹窿午同夜皓然天地玉壺中元宵已報梅
花信入夜還飄柳絮風銀箭催殘春漏短瓊枝壓
破小桃紅曉來生意乾坤大四海春風捧日曛

春雨一月戲作

一春花柳半沉埋深院霏、拂燕釵四野濃雲霾
麗日三旬夜雨滴空堦烘晴桃杏燕支滴振翼鴛
鴦錦翅乖欲向東郊試油壁阿奴還肯為擠排

重過玉山縣

玉山一塔插青天紫樹蒼藤鎖翠煙懷玉山人今
已矣大年文譽尚依然

楊憶字大年祖文逸宰玉
山憶生之夕文逸夢一羽

衣自稱懷玉山人覺而憶生憶後有詩送表弟章
得象知玉山縣云懷玉煙環長舊闡彭澤公田今
已廢遠東邑子半應非津亭送
別空回首籍在金門未得歸

送邵武經歷郭器之榮歸

甘棠遺愛滿樵川畫道君如杜名賢耆老不須留
再任皇恩只許住三年素秋客路多紅葉清儉行
糧祇俸錢別後熙春山上月應隨文旆去朝天

上福建閩海按察留畊曾僉事

攬轡巡行致太平好施大手試經綸霜威閩海皆
知姓清譽人間摠道貧三傑一門名四海兄弟有
能聲號一一廉兩字重千鈞還知部屬民嗟怨
門三傑

道無錢買課銀

再續福唐祠山紅字夢中作

予丁亥春客福唐嘗過九仙烏石山拜謁祠
山因繼壁間紅字韻絕句庚寅秋因公還樵
一夕夢與陳蘭心復到祠下仍繼壁間前韻
覺而書之以紀歲月

昊天樓閣接長空千里江山入座中一自落霞翻

海後更無人押壁間紅舊題云參差臺殿跨晴空

朝天似水落霞
翻海浪花紅

樵嵐九曲

水鏡軒窓面、山幾多風月在其間歸來問有如
何樂清夜安眠白晝閑

庚寅冬至

樵嵐九
曲作

樵嵐歸興有詩催春共回鞭作伴來一氣陽生舒
日晷萬方暖律報葭灰人間未雪迎新臘天下先
春占早梅水鏡歸來開小酌頻呼兒女覆金杯嘗

三秋何必說西湖故
里樵嵐樂有餘之句

自頌

興來俯仰邀明月筆健縱橫掃古詩水鏡此情真
隱吏被人剛喚作同知

贈星命徐竹亭

二首
并引

竹亭徐君携詩二篇過我議論星命誘我赴
功趨事進以超獵噫功名富貴乃金枷玉鎖
北邙漢塚烏江楚廟水鏡識破此理不直掩
鼻一笑耳所愛者惟棄置人間事眠雲卧月
釣雨耕煙以樂天年而已豈羨區區一品而
自取驅馳拘縛耶拏筆奉酬二韻以贈竹亭
之行

不問窮通試問君斗牛星畔有何人莫言官祿宮
中事便買扁舟訪水濱

又

湖海清幽號竹亭此君直節得高名渭川湘浦多
煙雨我欲垂釣過此生

寄建康行臺石塘吳都事己丑歲

贊畫烏臺第一人西江宗派擅文聲石塘有水明
如鏡判筆無私見若神根本一廉來建鄴甘棠千

頃在安仁

曾任安仁縣政事廉敏民甚感之

他時事業冲霄漢須

記相逢寓七閩

水竹軒乃予退居之所政與熙春樵嵐相
隣朝暮之間雲煙變態四時之景氣象萬

千其畫工吟筆之所不能盡者皆致吾書
窓几席之間因賦樵嵐閑居水竹軒土字
韻十首邀好事者和之

水鏡得閑居脩竹蔭軒廡樵嵐城市外迥有山林
趣幽窓宜習靜孤坐忘百慮風枝正韻秋寒葉更
飛雨茲來息奔走即此成燕處道勝物自輕權筆
皆糞土

環溪數百竿幽獨伴清廡未稱子猷居雅有瀟湘
趣倦游還故廬便靜忘俗慮此君二美并宜風亦
宜雨向來隱七賢今者吾獨處昨夜長龍孫觝

爭出土

休官遠市朝何心羨公廡脩竹遠清泉幽絕樂真
趣靜坐入精微關心無雜慮得閑仍此居足可蔽
風雨生計在桑麻天意必能處早晚課家僮勤灌
園中土

一壑接熙春九曲抱深廡靜有山水樂豈無煙霞
趣終日聊娛憂度歲可消慮澄潭俯幽鑑直節溜
秋雨悠然心事遺甘與麋鹿處因嗟舉鼎人朽骨
塋荒土

容膝坐小軒野興厭廊廡潺湲水竹幽寓此得佳
趣憂道輕黃金身外何足慮水鏡瑩無塵竹圃自
煙雨幽棲雖寡徒筆硯可同處更喜芋區旁尚有
種瓜土

深居絕送迎蘚徑荒門廡幽池若鏡明林壑多雅
趣水竹小洞天脩然散孤慮閑存天地心獨坐聽
夜雨小園餘一老此意能自處飽飯樂天年何必
首陽土

紅日耀東窓幽竹蔽西廡隱几自忘機永晝得閑
趣出關尚風塵巖拙消萬慮碧藻集遊鱗翠葆洗
新雨憇此興無窮心期得幽處卜居樵嵐門曲徑

非曠土

人迹罕有到敗壁依頽廡竹迳長蒼苔杖屨宜涉
趣遠碧掛窓樞鈎簾可忘慮水寒浸明月竹密巖
細雨歸來隱茲軒古史可相處門外柳成陰慚愧
沙堤土

閑居踈古人燕雀喧亭廡俯視水竹間欣然得幽
趣冰雪映襟懷塵煩無所慮齋生仁風蕭然作
暮雨月來動吟興開戶與區處詩成天地寬吟筆
勝守土

郊居景脩然清幽隱林廡薜蔓依墻生倍有田園
趣且和淵明詩何必蘇秦慮水竹本清泚時復過
小雨幽絕勝高僧孤懷類野處新種武夷松雅稱
樵嵐土

辛卯春早

三月廿六夜
喜雨戲作

三更霖雨喜已到一半井泉猶尚枯孤枕莫辭終
夜聽一春已是五旬無

七臺山

夢中作
并序

邵武七臺山距古樵僅百里山有七級磅礴
於邵武汀劍三州之境昔有福唐劉聖者居
之善役虎豹封真濟慧應大師居民建祠在

馬予居官江東之漂陽以上書陳言閩間病
民弊事庚寅秋益因公還樵甚欲一到醜荅
心香冗奪未果冬仲二十五日夜登其山瞻
禮之餘天宇豁然臨軒凝眺峯峦相比萬里
風雲一目可了回觀東北落霞爛然上下天
光澄輝千里遙想漂陽正居其下覽景興懷
賦詩一律問僧借筆擬書於素壁之間風號
古木頓然警悟乃坐蒲團擁地爐兀睡於樵
嵐草舍中方知所見乃夢也側聞譙樓夜已
三鼓矣所賦之詩歷：能記因筆就書封香
送留佛地以為異日之榮觀耳至元庚寅冬
仲廿五日夜水鏡元淮書於樵嵐福山道院
路入穹蒼草木芳尋幽借便一還鄉山橫萬壑如
平翠地跨三州若小航伏虎當年人已見齋僧今
日飯猶香登臨休說三山近

七臺山與南
福州比隣爛錦霞

邊是漂陽

熙春小景

一迳樵嵐入翠微紫藤紅樹靄霏：幽禽也學如
簧語唱得春山笋蕨肥

己丑秋揚州懷古

閑登此日憶隋朝昔日迷樓今土丘古澗尚存獅
子口荒池常得鳳釵頭笙簫聲逐秋風去歌舞人
隨薤露休千里汴堤連塞草錦帆不復掛龍舟帝場
時浙人項昇進新宮圖帝愛之令揚州依圖營建
既成帝幸之曰使真仙遊此亦當自迷乃命名迷
樓

題閣學何公月湖文集 并引

予祖居撫之崇仁本邑藏一內翰陳公亦居
月湖西齋相近古樟之下予小年寄學於茲
輪雲之後至元庚寅歲於樵川偶得月湖文
集乃至堂移牒所需之本集尾有月湖姪萍

鄉宰書識可驗披閱之餘不無感慨就書一
律以紀歲月云耳

此書曾到玉堂來水鏡今朝試展開馬踐黃塵昏
宇宙國亡青史墜風埃尚存魯壁三車字猶昧秦
坑一聚灰百有餘年鄉國事重逢樵水亦奇哉

郊行

夜來一雨洗桃花向曉東郊景物賒遠近酒旗招
過客淺深紅杏簇人家樹藏古寺茶煙渺水遠孤
村竹迳斜喚酒携魚深巷去閑中水鏡樂年華

發平翠樓晚眺 辛卯季秋
繼兵字韻

崔嵬樓閣星飛雲此景僧繇摸不成列岫縱橫環
翠麓湍流洶湧接灘聲西風搖落秋林瘦白鳥斜
飛夕照明平翠樓高宜晚眺暮鴉啼散轉孤城

歸興

三秋何必說西湖故里田園樂有餘碧眼奚奴收

藁草負囊隨我返吾廬

九月十五乃予始生是日訪雲峯古刹以

避喧囂就賡漢陽太守吳公賢良韻

辛卯歲

一迳羊腸曲更微猶勝宦路踐危機雲藏古寺鐘
聲近煙鎖嵐光遠岫稀松頂鶴來枯榦立山腰僧

帶夕陽歸閑來避俗因過此頓省平生俯仰非

樵嵐隱居

草色自侵簾山莊帶郭田樵嵐凝翠麓水鏡印青

天九曲隨春漲孤舟任晝眠鄰翁來泣訴猶欠買

銀錢

范文正公饒州治政事實

憶昔雷轟薦福碑

范文正公堅朋黨出知饒州令齋夜話云公守饒日有書生獻

詩甚工自言平生未嘗飽時歐陽率更薦福寺碑

一夕雷擊碎其碑東坡詩祠堂頌德有新詩饒州

新茶十萬勛民甚患之文正領郡日奉表乞免上

後之詩人李深題文正祠堂云一章奏免貢新茶

惠及饒民幾萬家遺老至今當年一紙蘓民表落
懷德政為余談此屢咨嗟
在鄱陽天下知

熙春山會景福地

環碧江山入座中雨暘應禱惠無窮祥光影裏金

釐上俯視人間曉日紅

上福建閩海廉訪弘道趙僉事

江浙能聲四海知浙西江東又承恩命下龍墀為

憂閩海吏尤酷故遣皇華節重持攬轡澄清行國

憲觀風問俗恤民疲願公大展經綸手細聽民歌

德政詩

治政

善醫民瘼有真方俊傑嘉言滿世香千古蕭曹刀
筆吏吏能全不在文章

唐鑑

當時德化及漁樵輕利安民欲舜堯可笑治書權

萬紀只言銀發在宣饒按通鑑所載唐太宗朝有

饒二州銀大發采之歲可得數百萬緡上曰朕貴

為天子所乏者非財也但恨無嘉言可以利民耳

賢退一不得數而專言稅銀之利昔堯舜抵璧于山

投珠于谷漢之桓靈乃聚財為私
藏欲以桓靈俟我耶遂黜使還家

癖習

竹窓試筆畫梅花石鉞煎湯煮草茶別是一般清
意味不堪說與五侯家

水鏡行藏

家住臨川村學堂小年逃難在閩鄉篇詩有味功
名小萬事無心歲月長種芋祗園兒女飽抄書堪
嘆古今忙秋來樵水清如鏡甘與妻孥老釣航

漂陽總管水鏡元公詩集卷畢

余祖始水鏡公官漂陽時著金困集仍梓焉
後繼兵燹幾於泯矣六世祖道泰公搜而復
之正德間板又灰燼迄今僅存一二帙余因
謂兄輔姪正與其弟善曰吾輩遊庠學舉子
業先人之祐將遠大之况祖有美弗傳責曷
辭焉余同精校之俾重梓以為家庭訓庶乎
金困之集復續于後道泰公對揚之孝得昭
於無窮云萬曆甲戌仲夏吉十一世孫應會
書

七

此書係... 卷之... 目錄...

